

In bel regal per 200 onns scola chantunala

Preschentà il svilup da las midadas socialas e da la politica da furmaziun

■ (anr/gc) En insaquants dis po la Scola chantunala grischuna festivar sia existenza da 200 onns. Per quest giubileum è era vegnì edì in cudesch. Quel enserra las midadas socialas ord vista contemporanea, istorica e da la politica da furmaziun da la pli enconuschenta scola media dal chantun. Sco editura segna la Fundaziun da cultura e studias da la Scola chantunala grischuna. Realisada è l'ovra trilingua vegnida d'in team da 17 collavuraturAs cun ferm sustegn finanziel da l'uniun dals anteriurs – ch'exista gist dapi 100 onns. Il cudesch sa preschenta sco cumpletaziun (6. tom) da la Nova istorgia grischuna, cumparida ils davos onns.

Satisfatg da l'edizium ferm sustegnida

Il rector da la scola chantunala, Hans Peter Märchy, corresponsabel per la sparta administrativa da l'edizium, è zunt satisfatg ch'il project «200 onns Scola chantunala grischuna» ha – sco el ha ditg ier tar la preschentaziun da l'ovra als meds da massa – pudì vegnir manà a buna fin gist sin il giubileum. Questa edizium cumpletteschia la Nova istorgia grischuna e sa drizza a tut quels ch'èn interessads vid l'instituziun giubilara.

Jolanda Nydegger è parsurata da l'uniun-editura sco da quella dals anteriurs che haja dà 100 000 francs vi dals custs totals

da 330 000 francs per l'edizium giubilara, era vegnida sustegnida ferm da blers mecens, sponsurs e fautors. Gist avant 100 onns è l'uniun dals anteriurs vegnida fundada per l'emprim centenari da la scola. Cun gidar a realisar l'edizium giubilara haja ins vulì metter in segn dad attaschadadad istorica per il giubileum da la scola chantunala. Tras in discurs al podì vegnia era l'uniun dals anteriurs a sa participar tar la festività giubilara en curt.

Descrit l'istorgia sut in aspect modern

Gronds merits per l'ovra reussida ha oravant tut il nov conrectur e neodocter, Gion Lechmann, stà manader scientific da la redaziun e dal project per la nova istorgia da la scola chantunala. Fin uss hajan be ils dus anteriurs rectors, Johannes Bazzigher e Jannett Mihel descrit la istorgia da questa pli enconuschenta scola media dal Grischun per il centenari (1904), resp. per ils 150 onns (1954). En il decurs dals davos 50 onns saja il svilup dentant stà considerabel sin il sector da la scolaziun.

L'ovra, concepida e realisada sut in aspect modern, descriva a moda scientifica il svilup da la scola chantunala durant dus tschientaners, metta accents spezial, lascha passar revista la cronica ed era in personari. Ella na sa drizza be sulet als anteriurs, mabain ad in publicum pli vast,

vulend esser bain chapibla, levamain accessibla ed era servir per consultaziuns. Era resguarda ella la trilinguitd grischuna.

Sco funtaunas han ins duvrà l'archiv da la scola chantunala, la biblioteca e l'archiv dal chantun, rapports annuals, protocols da conferenzas, dumondas ad autoritads surordinadas sco era la posiziun da la regenza ed intervenziuns en il cussegl grond.

In'ovra da cuminanza

Quest grond project n'ha betg pudì vegnir realisà be d'ina persuna. Malgrà ch'ins ha qua tras ristgà da sa perder, ha la direcziun dal project preferì dad engaschar per quest'ovra in team da 17 auturas ed auturs – tranter quels era insaquants Rumantschs. Bun agid han era informatichers prestà. Ils responsabels dal project han era pudì profitar da buns cussegls e bleras propostas da glieud da professiun. Da numnar èn tant il lectorat tematic – surlonder ha Leo Schmid referì tar l'orientaziun – sco era il linguistic. Per la finanziaziun e vendita è Hanspeter Federspiel stà responsabel. Senza generus agid finanziel na fiss l'ovra – cumpletada cun numerusas illustraziuns, blers documents, excurs e texts davart eveniments spezial – maina stada realisabla.

Tratg in vast artg

L'anniversari «200 onns scola chantunala» è stà ina buna chaschun per dar in sguard enavos sin il svilup da questa zunt impurtanta instituziun da furmaziun per il Grischun. Il cudesch na descriva betg sulet il svilup da las partiziuns da la Scola chantunala grischuna. El enserra era ina contribuziun davart la collavuraziun da quella cun las scolas medias privatas en il Grischun dapi 1963, dat en l'artitgel «Dunnas a la Scola chantunala grischuna» invista en il svilup da l'egualitad e relata da fastizs, laschads enavos dal moviment da 1968 en questa scola. Ina CD-ROM agiuntada cuntegna il register da scolaras e scolaras da las classas finalas dapi la fundaziun. Da retrair è il cudesch cun pli che 300 paginas per 68 francs da la Chasa editura dal Fegl mensil grischun.



Il mainaproject, Gion Lechmann, ed il rector, Hans Peter Märchy (dretg), pon dar cun blera satisfacziun in sguard en l'istorgia da la Scola chantunala grischuna per ses 200 onns.